



Mizoram: BJP nungi N Zangura
LADC tekolakba kümogo

IPL 2025: RR-i Rana melen
Lhuan-dre Pretorius shimogo



Medical College Hospital atema asendenshi senden amen

Dimapur, Monupii/May 08 (TYO): JICA ODA Loan Project kübok NISMR, Kohima nung Medical College Hospital amenoktsü atema Department of Health & Family Welfare aser Project Management Consultancy (PMC) firm Nippon Koei India Pvt. Ltd. tsüngta Kick-Off Meeting ka May 6 & 7, 2025 anogotem mena liasü.

Project mapa kuma inyak tenzüksü, project scope, stakeholders teinyaktsü aser nüngdakba teyari mechanisms indang jembitsü nükjidong nung iba senden ya mena liasü.

Iba senden ya Commissioner & Secretary, Health & Family

Welfare lenisüba kübok agi, kong Project Executive Committee, PMU aser Department nungi ketdangsürtem dena liasü.

Iba sentong nung shilem ka ama parnoki Medical College Hospital amenoktsü tesem mekazüka aliba semdanga iba project inyaktsü atema sentong yangluba nung yaritepa liasü.

Nagaland nung medical education tashi itshidakja healthcare tajungba agütsütsü nükjidong nung Kohima nung state-of-the-art Medical College Hospital asangsang kumdaktsütsü asoshi ibai alizüng tongtipang ka alitsü.

ASU-i kaketshirtem saksalemtsü metetdaksür

Dimapur, Monupii/May 08 (TYO): Angami Students' Union (ASU) ajanga sangdong ka nung, private colleges, school, coaching institutes aser hostels kar tajanzük aser business atema nisung kari ketdangsüba ajanga facility tera mesüra meliaka fees kanga sashia kumdaktsür, anungji tim ketdangsür den külemi item reju tem kanga junga mittsü, ta metetdaksü.

Tamakok anguba subjects aser absentees atema senchi memeshitsüla aser tarutsü nung sangdong ka magütsü tashi Angami litsü-lika nung tuition fee indang ASU-i renema aliba shidak amshitsü. Tuition fee ya Class 10 aser tekübokpur dang ita nung kaketshir shia sen 700 agitsü, hopta ka nung class pongu bo agitsüla aser class ya tajemba agi ghonda ka asütsüla, ta ashi.

Home tuition agirtem asoshi monthly fee ama sen 2000 dang meshitsü aser class shia tajemba

agi ghonda ka-ka agitsüla. Single tuition batch atema tesayur aser kaketshir ration ya 1:6 asütsüla. Yangi shia aliba fee structure ya urban areas atema kisüng lir, aser pei yimtsüng aser jurisdiction nung unit ajungai pei sasep fee structure yanglutsü metetdaksür, ta ASU ajanga ashi.

Iba sülen manidakra, nüburtemi Convener, Grievances Cell indang mobile number 9863344317/ 8794983064 nung SMS mesüra call süa ashitsü akok, ta ASU sangdong ajanga ashi.

School mapang kaketshirtem uniforms agir yi amshidak, cyber cafes mesüra danga tesem nung senzütsü memelar. Aser yamaji ajangshira, item tesem kibur nem kasa temerenshi agütsütsü, ta ashi.

Kaketshirtem uniform nung tim masüba mapa inyakba putetra, school telung aser tema nung merenshitsü ta ASU sangdong ajangasa ashi.

Arok asoshi onoki akhangba sorkari angatettsüla: CNCCI

Dimapur, Monupii/May 08 (TYO): District Chambers of Commerce ajanga District Urban Local Bodies (ULBs) nung züngsemtsü atema takhangba tejangja indang asadanga jembishinüba atema Chief Minister Dr. Neiphiu Rio aser par Cabinet züngsemtem dang pelaba lemsateper, ta Confederation of Nagaland Chamber of Commerce and Industry (CNCCI) ajanga sangdong ka nung ashi.

Cabinet agenda nung iba ken o inoksemba aser iba sülen jembiba ajanga sorkari state tesemajungalen shishilempar aser consumers asoshi süoki ia bilemba sayur.

Sorkari temulung agütsüba atema pelar, saka tawa Cabinet indang telemteba ajanga CNCCI süngmanger aser süoki ia bilemer, koba April 23, 2025 nü senden ka amendang Department of Urban Development & Municipal Affairs (UD&MA) ajanga proposal benokba den mesüktepa lir.

Iba proposal ya CNCCI ajanga jashia aliba district tem nung April 24, 2025 nü business shutdown ayongzükba nung langzüba ka liasü, koba CNCCI ajanga khenyongi magizük, ta sangdong ajanga ashi.

Iba yongji District Chambers temi mapang talangka nungi tejangja akhangba ya Chief Secretary aser department ajanga Cabinet matsüngdang shidak benok asü masü ta bilemer.

ULBs nung representation atema akhangba ya tang tasen masü ta nüburtem aser sorkar nem tejangja angatetdaksüner. Iba indang ya tesüiba küm pezü tashi yimya balala ajanga tanen makai osang agitepa aru, ta CNCCI ajanga ashi.

September 9, 2021 nung CNCCI ajanga formal representation ka Chief Secretary nem agütsü, iba sülen November 9, 2021 nung UD & MA indang Commissioner Secretary nem reminder agütsü.

Iba den külemi September 22, 2021 nü iba mapang aliba 12 District Chambers temi representation tem pei sasep Deputy Commissioner tem ajanga Chief Secretary nem agütsü.

2024 küm CNCCI delegation kati Chief Secretary den pa indang office nung ajuruteba iba ken o angatetdakja liasü. Iba senden temer Chief Minister'er kidang sensaksema amenba mapang Chief Secretary dang maneni tepang o agi angatetdaksü aser paia ULB elections sülen iba ken o bentettsü telangzüba tajung agüja liasü, ta sangdong ajanga ashi.

Nomination procedure nung aliba ama District Chambers ajungai pei alidak Deputy Commissioners ajanga nomination papers agütsü. Ajisüaka tesasatsüka Mokokchung aser Kohima nungi Chambers tem kisüng aniok. Parnok aniokba atema pelar, saka teshimtet kar kisüng asoshi inyakba ajanga tanünga District Chambers toku nung tejashi aser bensaa amshiba ama tangatetba aيتدaktsür.

Iba yongji aser tejashiba tali akumba sayua CNCCI ajanga April 25, 2025 nü yimjung aser democratic yimya nung 'indefinite voluntary business shutdown' alitsü ayongzük. Iba arok inakyim ya jashia aliba District Chambers toku mepelaba sayutsü asoshi liasü. Iba sülen sorkari senden ka atema CNCCI jaok aser iba

mapang ozü tangatetba jangja-jangja lemsatepogo, ta CNCCI sangdong ajanga ashi.

Chief Secretary aser iba indang department ajanga lemsatepba nung ajemdaker Cabinet telemteba ya agia alitsü ta onoki angateter. Anungji iba onük ya Cabinet nem ochi agi lemsateptsü tongtipang lir.

Onoki Chief Minister aser Cabinet dang mapang talangka nungi tim takhangba ya tanaben asadangshitsü ajungshir. Onoki Chief Secretary aser Department of Urban Development & Municipal Affairs dang iba ken o shidak aser tejangja Cabinet nem angatetdaksütsü akhanger, ta CNCCI ajanga ashi.

Iba takhangba ya jurila mesüra yimtenren tsütsü mangdang ajanga ajungmesoba ka masü ta nüburtem nem angatetdaksüner. Ibai business community aser tongtipangsa state nung aliba consumers tejangraba kumzüka ayutsü nükjidong nung lir. ULBs tenteter tawa market regulations aliba ajanga yangji nübu alitsü nüngdakba sayur, ta ashi.

Sorkari mepishiba akumtsüboa aser tajung bilema CNCCI aser District Chambers temi hopta ana atema shutdown thinena aruogo. Ajisüaka pangzüng shidak ka melira, CNCCI ajanga jashia aliba district toku ya par democratic temeden nung shilem ka ama mapang telatet makai shutdown lidaktsütsüsa akumtsü.

Nüburtem dang jelia osang peria metetdaksütsü. Anungji nisung ajak dang angateta aser amalitep akatsü ayongzüker, kechiaser ibai state nung business sector aser consumer tem ajangzüktsü asoshi inyaker, ta CNCCI sangdong ajangasa ashi.

Nagaland Angh-i temeim mapa tali inyaktsü ayongzük

Kohima, Monupii/May 08 (TYO): Meimchir tenzükbä aser ariba bilemba jenjang ya kodanga mesamar aser timtem mapang Red Cross volunteers temi anibelem mesasai bendanga agütsür tenzükbä ya humanity indang tanüla lir, ta Nagaland Angh La Ganesan-i Brehostibarnü ashi.

"On the side of humanity" omen nung ajemdaker Brehostibarnü Kohima nung World Red Cross Day amungba sentong nung jembidang, "Timtem mapang nenoki anibelem mesasai bendanga agütsür tenzükbä ya humanity indang tanüla lir," ta Nagaland Angh aser Indian Red Cross Society, Nagaland State Branch

tiri ashi.

Alimar lendong balala ajurudang parnoki tongtipang shilem agiba aser lisa tamajung süaka meta talang nung aliba nüburtem tonga oa yaritepba indang lemsatepdang, Ganesan-i ajaki temeim sayutsü aser nübur tenzükbä mapa nung lanur timbai shilem agitsü ayongzüka liasü.

Taküm iba anogomung omen yagi teimla, dangar indang timtem angatetba aser temeim sayuba indang meimchir jenjang taroktiba lepa reprangshitsü ajungshir aser item ya Red Cross mission indang tongshi tem lir, ta pai ashi.

"Teimla ya tesangya lir, koba agi tammang ajanga asenok anir, dangar mulung angatetba ajanga

dangar timtemba nung asenok sendakteper aser temeim sayuba ya oshi ka lir, koba temulung raksar alir temia angateter," ta Angh Ganesan-i ashi.

Paisa nüburtem, talisa Nagaland nung aliba lanurtem dang dangar tenzükbä takum ka asütsü ayongzük aser tzü-mopung melenba, health crises aser bendanga amshiba amala tanü tebilemtsü nung arok tejangraba aser lanurtem tashi nüngdaker, ta pai ayongzük.

"Nenok ya asüng atema lenirtem kisüng masü, nenok ya tanü temelenshi yanglurtem lir," ta pai ashi.

Tanur asüidang nungi dangar dak aria bilemba mulungsentsü adokdaktsütsü nüngdaker,

anungji kibongtem aser kakat reju temi itemi tanur nem angatetdaksütsüla, ta Nagaland Angh-i ashi.

"Dangar timtem angatetba aser dangar dang temeim sayuba aliba lokti ya mangdang ka dang masü - ibai asenoki anogoshi temeim mapa inyakba ajanga sayur," ta Ganesan-i ashi.

Red Cross founder Jean Henry Dunant nem akum agüja jembidang, "Asenok ya kotak tenyara masü mesüra temeshi nisunga masü, saka asenoki kechi inyakteter aji inyaktsü merangba nisung meimchirtem lir," ta pai ashi.

Iba sentong nung MC Member, IRCSN, Dr. R. Rose Chakhesang ajanga sentong

indang omen rateta ashi aser IRCSN New Delhi Secretary General indang salem o ya General Secretary, IRCSN Akhale V. Khamo ajanga zünga ashi.

Sentong nung IRCSN Vice Chairperson, Helena Yephthomi menden liasü aser Director Nagaland Catholic Youth Movement Fr. Kokto Kurian ajanga sarasadema sentong tenzü.

MC Member, IRCSN Jonas Yanthan ajanga pela agizükba o jembä, Junior Red Cross, Bayavu English School, Kohima ajanga temeja ken ka aten aser MC Member, IRCSN Dr. Theyiephrezo James Solo-i melepzüng o jembia liasü.

Aliba yimtak Züngi Benjungmung kaogo



Aliba yimtak 4 th Cucumber Festival nung Tetushi Tejaoker Hon'ble Advisor Agriculture Mhathung Yanthan-i züngi, chiyungtsü aser osettsüet ayokba stalls-tem lapoktsür külen Minister Temjen Imna Along aser lenirtem den tangokba.

Aliba, Monupii/May 08, 2025

(TYO): Tanü Aliba yimtak 4 buba Züngi Benjungmung (4th Cucumber Festival) Hon'ble Minister, Tourism & Higher Education Temjen Imna Along aser Hon'ble Advisor Agriculture Mhathung Yanthan tena jaoka kaogo.

Tanu iba sentong nung tongti tesemdang Hon'ble Minister, Tourism & Higher Education Temjen Imna Along-i jembidang Aliba nung züngi lua ayimertemi mapa meranga inyaktetba ajanga tanü iba züngi benjungmong ya amonger, anungji nenok züngi lu ayimer nem tenüsang agütsürta ashi.

Nagaland Chief Minister

Dr.Neiphiu Rio-i aniba sorkari aluyimer tsütsülen temelung agütsür, Aliba nung züngi lu yimer iba ama benjungmong ayongba ajanga alima ajungai Naga lima meteta Naga nung nem khonang bener arutsüogota züngi lu ayimer aser Aliba nung tenüsang ashi.

Tang agi Züngi benjungmong 4 ben tashi monga arudang kanga dang junga monga arudar, ano tarutsü nungibo temeket aliba yimtsüngtem den shisa agitepa parnoka par züsentetbatem alimai meteta akümtsüsa nenoki shisa agütsütepa yariteptsü kanga dang nungtakerta Minister Temjen Imna Along-isa Aliba

nung ajungmesoa jemb.

Sentong nungsa Tetushi Tejaoker Hon'ble Advisor Agriculture Mhathung Yanthan-i jembidang Aliba nung züngi lu meranga inyaka yimer züsentetbatem bendena yur benjung amongba ya benjung rongnunga balaka lir, züngi-jibo tesem ajak nung angur saka Aliba nung züngi alima nem metetdaksüogo aser ibaji Naga nung Khonang lirta ashi.

Agriculture Advisor-isa Aliba nung Naga nung nem meranga inyaksü aser ibaji ajanga rongsen lenmang pateta aotsü asoshi shisatsü agütsürta tepelaba olen ka ashi.

(Maneni tapak 8 nung...)

NDPP tir kinungtsü Nokpangmenla den asükhu lemsatep

Dimapur, Monupii/May 8 (TYO): Nationalist Democratic Progressive Party (NDPP)-i sangdong ka ajanga party tir Chingwang Konyak kinungtsü Nokpangmenla Chingwang May 8 anepdang Guwahati nung asüba osang angazüka mang ayimba sangdongogo.

Party tir yimden yimsüsüba nung tia tensa ajak ajanga aoba mapang pa kinungtsü pa tenongiter tuluba, tembar aser lensayur ka ama pa nongitogo.

Par kinungertem den la asüba onokia mang ayimer aser tulusang Tsüngremi mangyimjashi mapang

anisüngzüik agüjang aser asür tanüla teti tatem makadak anisüngzükdakjang ta sarasademtsür, ta kasa sangdong ajanga metetdaksü.

Naga People's Front (NPF)-ia Nationalist Democratic Progressive Party (NDPP) tir Chingwang Konyak kinungtsü Amenla asüba osang angazüka asükhu lemsatepogo.

Amenla ya tenükshitsü aketba, telemla aser tashitait tetsüka liasü. Nagaland nung ajaki züngshiba yimden yimsüsür ka kinungtsü ama lai tasüita nokdakogo. Lai lar

kinungertem dang nongita yariba masü saka la temeim aser ajemaluba ajanga nisung taküm aika dak kongshiogo. La asüba ya lar kinungertem atema dang masü saka Naga nung atema takoksa tulu aser menelentsü makoktsü.

Onoki Chingwang Konyak aser asür kinungertem den asükhu lemsateper. Tulusang Tsüngremi asür tanüla teti tatem makdak anisüngzükdakjang aser lar kinungertem dang taochi sayuang ta sarasademtsür, ta kasa sangdong ajanga metetdaksü.

(Maneni tapak 8 nung...)

Mokokchung District nung International Red Cross Day mungogo

Dimapur, Monupii/May 8, 2025 (TYO): May 8 nü Indian Red Cross Society Mokokchung Branch-i ayongzüka CMO Conference Hall Mokokchung nung International Red Cross Day mungogo. Iba sentong ya "On the side of Humanity" omen nung ajemdaker munga liasü.

Sentong nung shilem agirtem pelashishia agizükba mapang Dr. S.S. Akaba Longchar, Honorary Secretary IRCS Mokokchung-i, Indian Red Cross Society ya meimchir tenzüksü atema lir ta ashi. Paisa, faculty aser School balala nungi Junior Red Cross volunteers tem aser IRCS züngsemtem dang parnoki maneni humanity tenzüksü atema tenüsang

agütsü, koba iba anogomung amungba nukjidongji lir, ta ashi.

Sentong nung Addl. Deputy Commissioner Mokokchung Chumlamu Humtsoe-i, iba anogomung koda tongtibang iba indang lemsatepba den Red Cross volunteer tem nem tenüsang agüja liasü. Paisa, angati agi tangar tenzüksü koba item volunteers temi sayaogo, iba ya tenüng asangtsü langa lir, ta ashi.

Paisa, sorkar sentong aser inyakyim balala nunga lokti-i shilem agiba ajanga state terenlok nung teyari tulu agütsür, ta ashi. Yamaji Red Cross Society züngsemtem yagi volunteering indang tatishitsü tajung sayur, koba meyipa kecha memeshi-i

teyari agütsüba lir. Paisa, züngsemtem dang Red Cross indang fundamental principles tenet; Humanity, Impartiality, Neutrality, Independence, Voluntary service, Unity adser Universality ya mamatoki benshitsü ayongzüka liasü.

Ajak senteper Mokokchung district kübok school 6-i iba sentong nung IRCS Mokokchung züngsemtem medeni volunteer 77 den shilem agia liasü.

Dr. Sentizungla Marina Yaden, Chief Medical Officer Mokokchung-i anir IRCS züngsemtem aser Vice Chairman IRCS Mokokchung Branch den JRC züngsem aser teacher in charge temi iba sentong nung shilem agia liasü.

Committee on Subordinate Legislation senden ayonger

Dimapur, Monupii/May 8 (TYO): MLA aser Committee on Subordinate Legislation, Nagaland Legislative Assembly mendenbuba Zhaleo Rio-i, metetpela senden den repsema Committee indang Internal Working Rules Consideration aser Adoption senden ka May

16 nü ayongzüko. Iba senden ya Assembly Secretariat kübok C. Chongshen Committee Room nung 11 ako nungi tenzüka agitsü.

Committee züngsem ajak dang iba senden nung tamakok maludaktsüi aru shilem agitsü mepeshia metetdaksüogo.

Kohima aser Chümoukedima DPDB senden ayonger

Dimapur, Monupii/May 08 (TYO): Deputy Commissioner, Kohima, B Henok Buchem, NCS ajanga sangdong ka nung, ita shia amenba Kohima District Planning & Development Board (DPDB) senden May 15, 2025 anüngdang 11:00 ako nungi tenzüka DPDB Conference Hall Kohima nung amentsü, ta metetdaksüogo.

Anungji iba senden nung Board züngsem ajak medema arua adentsü ayongzüker, ta sangdong ajanga ashi.

Ano sangdong danga ka nung Deputy Commissioner, Chümoukedima, Polan John, NCS-ia May ita atema Chümoukedima District Planning & Development Board senden May 12, 2025 anüngdang 11:00 ako nungi tenzüka DC Chümoukedima indang Conference Hall nung amentsü ta metetdaksüogo.

Züngsem ajak medena arua adentsü ayongzüker, ta sangdong ajanga ashi.

FACTA hon jubilee mungogo

Mokokchung, Rongchii/May 8 (TYO): Fazl Ali College Teachers' Association (FACTA) tenteter küm 50 ajungba tenüngtem Golden Jubilee International Conference ka "Enduring Legacies, Emerging Visions: A Multidisciplinary Approach to Sustainability" omen dak rangloker FAC conference hall nung takok manung kaogo.

Iba sentong nung FAC nung

tesayurtem densema Royal University of Bhutan, Mizoram University aser Nagaland University nungi takutet shisashirtem jaoka onük tapu balala nung shisa lemsatepba den onük shia nung sensaksem liasü. Iba mungdang nung paper presenter parnok 31 liasü aser parnoki onük balala nung pei-i bushitetba shisatsü aser ajangshibatem lemsatep.

Mokokchung nung Oral Cancer Screening agiogo



Dimapur, Monupii/May 8 (TYO): National oral Health programme (NOHP) IMDH, Mokokchung-i ayongzüka angati oral cancer screening ka conference hall, MMC nung May 8 nü agiogo. Screening ya MMC sanitation workers tem atema liasü.

Sentong tatsüka agiba mapang, Health Incharge, MMC Councillor Taliyangshi-i, iba sentong asoshi department dang pelaba lemsatepba den, Health department inyakyim ya temoatsü ka ta ashiba den

nüburtem nem iba amala teyari maneni agütsütsü mepeshia liasü.

Dental Surgeon, IMDH Mokokchung Dr Keneitheja-i o tatsüka jembiba mapang ashiba agi, oral cancer screen süa tashidak mapang shitak nung puteta anepaluba ajanga taküm kümzüktettsü.

Sentong ya MMC sanitation worker tem angati oral check up asüba sülen tembang aser parnok nem Toothpaste, brush aser mozü densema oral hygiene kits tem angati lemja liasü.

Kohima nung auer pongu apu

Dimapur, Monupii/May 8 (TYO): May 6 nü Chiephobozou Police Station-i, auyaba ken o ka bushisüngdangba sülen takok tajung ngutetogo. March 21 nü Nerhe Model Village nung garage ka nungi gari engine aser gear box auyaba tashishiba ka benoka liasü.

Ken o kanga junga bushisüngdangba sülen police-i May 6 nü nisung pongu puogo. Aija alirtem ya Petekhrietuo (22 yrs), Ruokuozhalie (24 yrs), Neizasetuo (26 yrs), Raj (25 yrs), aser Throngpise (25 yrs) ta jangjaogo.

Bushisüngdangba sülen parnok ya gari engine aser gear box auyaba nungdang densema aliba masü saka Chiephobozou Police Station kübok ki balala rakpoka tua auyaba nunga densema aliba nguteta liasü. Parnok yagi merang osettem auya scrap dealers tem dang ayokba ngutetogo. Parnok ya Jaluki temeket nunga auyaba ken o nung densema liasü.

Iba dak sendaka nung Bharatiya Nyaya Sanhita (BNS) kübok section 305/3/(5) dak ajemdaker ken o ka Chiephobozou PS nung benokogo.

Sepaitemi kiralongrar 100 dak tali tepsetogo: Rajnath Singh



New Delhi, May 08, 2025: 'Operation Sindoor' dak sendakba osang metetdaksütsü atema sorkari ayongzükba 'party ajak senden' amendang tangokba noksa nung angur.

New Delhi, Monupii/May 08 (Agencies): Brihostibarnü New Delhi nung party ajak senden nung Centre sorkari, 'Operation Sindoor' kübok India nunger sepaitemi kiralongrar 100 dak tali tepsetogo, ta metetdaksü.

Iba senden nungji defence minister Rajnath Singh-i India sepaitemi Pakistan aser Pakistan occupied Kashmir nung kiralongrar camp balala amakba osang yimtenren party balala nungi lenirtem nem metetdakja liasü.

Iba senden nungji Lok Sabha aser Rajya Sabha naprongla nungi opposition party balala nungi lenirtem aden. Kasa senden nungji Union home minister Amit Shah, Union finance minister Nirmala

Sitharaman, external affairs minister S Jaishankar aser union health minister/BJP Tir, JP Nadda nungera liasü.

Iba senden tembangba sülen osangbenertem den jembidang Parliamentary affairs minister Kiren Rijiju-i, iba onük nung yimtenren party balala nungi lenirtem ajak obang ka asütsü atema party ajak senden ya ayongzuka liasü, ajioda lenirtemi tashishiba o kecha mejembi, ta metetdaksü.

Rijiju-i, "Linük nung nübur ajak sorkar aser sepaitem den longjema lir," ta ashi.

Defence minister Rajnath Singh-i, 'Operation Sindoor' maneni odar aser Pakistan-i mangyangra India-i maneni amaksü, ta metetdaksü.

Iba ama tensa ka nung

Congress-i sorkar pusemer, ta Congress lenirtemi metetdaksü.

Congress Tir, Mallikarjun Kharge-i, "Onoki Ato kilonser nem shilem agidaksüner aser pa nem kiralongra anema raraba indang tongmelang agi jembidaksüner. Sepaitem tasü aitba atema onoki sepaitem nem tenüngsang agütsür. Onoki pa (Modi) arua jembidaksünua liasü, ajisüaka pa maru," ta ashi.

AIMIM tongti, Assaudin Owaisi-i, "Asenoki TRF anema international campaign agitsüla aser UN Security Council-i iba telok ya kiralongrar organisation ka, ta sangdongtsüla. Asenoki United States danga TRF ya linük nung bendanger kiralongrar organisation ka ta sangdongang ta mepishitsüla," ta metetdaksü.

Linük aikati sensotem dang India aser Pak-i maotsü metetdaksü

New Delhi, Monupii/May 08 (Agencies): Indian Armed Forces-i 'Operation Sindoor' kübok Pakistan aser PoK nung kiralongrartem camp aika amakba sülen India aser Pakistan na tsüngda tensa tamajungba akümba nung ajemdaker United States, United Kingdom, Canada aser Australia densema linük aikati pei sensotem dang India aser Pakistan nati maotsü, talisa arrtsüleni maotsü tekümdangtsü metetdaksüogo.

Pakistan nung aliba US Embassy aser Consulates-i sensotem dang India aser Pakistan arrtsü aser Line of Control (LoC) anasa aliba tesemtemi maotsü tekümdangtsü metetdaksü.

United Kingdom Foreign, Commonwealth & Development Office-ia sensotem dang Pakistan aser India arrtsülen kilometer 10 telongtet aser LoC len kilometer 16 telongtet tashi nungbo senzüsempoong masütsü metetdaksü. UK-isa par sensotem dang Pakistan kübok Balochistan province-i maotsü tekümdangtsü metetdaksü.

Canada-ia par sensotem dang Jammu & Kashmir-i maotsü aser India-Pakistan arrtsülen kilometer 10 telongtet nungi pilaa alitsü metetdaksü.

Australia-ia Pakistan aser India nung aliba par sensotem dang kanga kümküma alitsü aser osangtsüsang metetpela

alitsü metetdaksü.

Singapore Ministry of Foreign Affairs (MFA)-ia sensotem dang Jammu & Kashmir aser Pakistan nati maotsü metetdaksü. MFA-isa India-Pakistan arrtsülen tensa kanga mejjungi lir anungji lokti aliba tesemtemi maotsü aser ministry den tongtepratepa alitsü metetdaksü.

China foreign ministry-ia par sensotem dang India aser Pakistan na tsüngda raraba tesemtem anasai maotsü aser kanga kümdanga alitsü metetdaksü.

Operation Sindoor sülen alima linüktemi iba tensa mita reprangdar aser sensotem dang ministry den tongtepratepa alitsü ajungshir.



Rajouri, May 08, 2025: India aser Pakistan arrtsülen tensa tamajungba akümba mapang Rajouri nung 'iba kiojen ya hospital' ta metetdaksütsü atema hospital ka kolak nung 'Red Cross' temaitsü rong atepba noksa nung angur.

Masood Azhar'er kibong züngsem-a aika süogo

New Delhi, May 08 (Agencies): Bodhbarnü kiralongrar telok Jaish-e-Mohammad (JeM) nung tongti, Masood Azhar-i, Indian Army temi amakba mapang nung par kibong züngsem 10 aser pa den atongtepa inyaker pezü süogo, ta metetdaksü.

Masood'er kibong züngsemtemji Pakistan nung Punjab Province kübok Karachi Mor tezülen Markaz Subhan Allah (Karachi-Torkham Highway anasa) nung liasü.

Indian army temi Operation Sindoor kübok minute 25 tsüngda kiralongrar camp 9 amak aser kiralongrar tajemba agi 70 tepsetogo.

Markaz Subhan Allah ya lanurtem nem training agütsütsü atema Jaish-e-Mohammed indang tongti centre ka lir. Iba centre ya ali acre 15 nung amenoka liasü.

Iba centre nungji Jaish-e-Mohammad tongti Maulana Masood Azhar den Mufti Abdul Rauf Asghar, Maulana Ammar aser par kibong züngsemtem liasü.

Indian Army temi missiles

amshia Pakistan telung nung aser Pakistan occupied Kashmir nung amakba kiralongrar camp 9 ji Jaish-e-Mohammed, Lashkar-e-Taiba aser Hizbul Mujahideen teloktem indang liasü.

Indian Air Force-i Pakistan arrtsülen aliba tesem pezü amak aser Pakistan-occupied-Kashmir nung aliba tesem pongu amak.

Ministry of Defence-i, Pakistan sepaitem indang kiojentembo mekongshitsüsa aser tensa tamajungba makümtsüsa tanga tesemtembo mamak, ta metetdaksü.

Ministry-i, "Kiralongrartemi Pahalgam amakba mapang nung India nunger 25 den Nepal nunger ka khasetba mangyanga iba telemtetba agia inyaker," ta metetdaksü.

Operation Sindoor kübok Brihostibarnep 1:05 ako nungi tenzüka 1:30 ako tashi nung (minute 25) India sepaitemi Lashkar-e-Taiba (LeT), Jaish-e-Mohammed (JeM) aser Hizbul Mujahideen pur camp aser kiojentem amak.

Uttarakhand nung helicopter tsükokba lendong nung nisung 6 asü



May 08, 2025 nü Uttarkashi district nung temeshi aini aoertem mena aliba helicopter ka tsükokba sülen bushisüngdangba noksa nung angur. Iba lendong nung nisung trok asü aser ka dang kümzük.

Uttarkashi, May 08 (Agencies): Brihostibarnü Uttarakhand state kübok Uttarkashi district nung helicopter ka tsükokba lendong nung tetsür pongu densema nisung trok süogo aser iba lendong nung nisung ka dang kümzük.

Iba tatalokba ya Aircraft Accident Investigation Bureau (AAIB)-i bushisüngdangtsü.

Helicopter nung mena alirtemji temeshi aini aoertem liasü. Brihostibarnep 8:45 ako meta Rishikesh-Gangotri National Highway nung helicopter ji tsükok.

District Magistrate Meharban Singh Bisht-i, iba lendong nung nisung trok asü aser ka dang kümzük, ajisüaka pa kanga mejjungi yirua lir, ta metetdaksü.

Iba lendong nungi kümzüksangji Andhra Pradesh

nungi arrshi küm 51 M. Bhaskar lir. Pa kanga mejjungi yirua tayimtsü ajanga AIIMS, Rishikesh-i anir ao.

State Disaster Response Force (SDRF)-i ashiba agi, helicopter ji Dehradun nung aliba Sahastradhara helipad nungi apusoa liasü ajisüaka Yamunotri nung aliba Kharsali helipad matongdang iba lendong atalok.

Iba chopper ji Ahmedabad nung aliba private company AeroTrans Services Pvt Ltd indang liasü, ta ketdangsertemi metetdaksü.

DGCA website nung shia aliba agi, AeroTrans Services indang Bell helicopters ana lir aser Cessna aircraft ka lir.

Civil aviation ministry kübok tayimtsü tsükokba tatalokbatem kuli bushisüngdangtsü atema AAIB nem lezmütsür.



TIR YIMYIM YIMOBILEM (EDITORIAL)

DIMAPUR

ROGONÜ

MONUPII 09, 2025

Relief jang maru nungbo !

India o Pakistan na rara tenzüker joko anogo ananübuba nungibo India anülulen aliba yimitem aika nung tayimtsü senzüba anenogo aser kaketrejutema shibangogo. Iba ama temulung tipmatemtsüsa kidanger kin ana tsüngda raraba ajanga shisaboluba agi nisung aika pei mapa inyakdak nungi pei kidangi meyipa arur alitsü. Iba ama tatalokba agi teinyakdak mapa aika anenadoker, asenoki mangur dang ashi, nisung aika takoksa tulu ajurua alitsü. Ano talisa, tongpang nung nokdaka aliba sepaitem aser par kinunger adianutemsa shisa teboluba bolua alitsü. Joko, kin ana tsüngda rarar asünungji kodang anentsüar memetet, anungji kibong shia pei nüngdak yari chiyongtsü aser osettsüseta bendena ayutsüba mapang agi atonger. Item ama shisabolu agi India nunger kibong aika tongogo. Ajisüaka, kodang Nagaland nungi India Pakistan rara indang ya bilemdangdir, iba rara ya talangka ao nungbo Delhi nungi senotsü dang masü saka relief janga meyokteti akümtsü südi ta bilema Naga nunger kibong aika shisaboludar asütsüa akok, kechiyong asenok senpong dang masü jangpong dena India anülulen yua lir. Aji oda, iba rara yagi Punjab aser Haryana nung alu junga meyimtetsüsa aküm nungbo asenok lu meyimtet toktsür amai asütsü. Tanü Nagaland nung asenok kechabo maka ser nung shisamebului aliba ya center nungi yokba relif jang angati amai agizüka chiyongtsü anguba agi shisa mebulur. Atangji, relief jang agi Naga nunger nübortem dang anisüngzük angur masü saka relief jang aruba nungi anguba temoatsü agi yimsüsür aser tulurtema aika anisüngzük ngua alitsü. Iba jagi balaka asenok mapa meranga meinyaker aser alu mayim ser kechi chiyongtsü ta shisaboluba shisabolu to kenyongi mali kuma samaogo . Aji oda, mapa meinyak ser relief jang chiyonga amongba agi yimtaklirtem o town nung alirtem na toktepa asenok ajak temangbo yira-yiraa kümogo. Ajisüaka, aji akhi masü, temang nung asentzü meindok ser relief jang chiyonga amongba agi kar shini tashidak aser kar pressure tashidak aser ano karbo tashidak anaprongla agi kangshia alitsü. Aji oda, jangbo relief jang saka temang nungbo relief mangur aser taküm-a relief jang chiyonga- chiyonga ak den kasasa kuma litetba purtemji asenok asütsü. Aji oda, relief jang chiyongba agi longa moutet kazüa alidang, ajungbena India-Pakistan na raraba ajanga asenok dangi relief jang meyoktettsüsa aküm nungbo kechi chiyonga taküm alitsü ta bilemdangtsübaji kanga nüngdaka kümogo. Pibo rarai aotsü shisabolua bilema alitsüa akok mesüra pei lu meyimtet aser pei factory shibanga ayutsüsa akümba takoksa agi shisabolua alitsü. Ajisüaka, asenokbo relief jang meyok nungbo ta asüba shisaboluba dak alaka pei lu meyimtetba aser pei mapa inyakdak mapa meinyakdak shibangadokba timtem takoksa ajurutsüsa kecha maliba taküm tia ya kodang jungjunga bilemdangdir, atangji, asenok ya kidang shibanger metsüba ak den kecha balaka tetsüngda talangkabo malia ta asenokia angatetsü. Joko, alima ya tipdemabo malitsü, anungji asenok taküm ya tangar dak nendaker alitsüba mapang masü, akhi tsüraburtem ama asen lu nung ruzükba chi agi asenbosa peritsüsa asenok aluyima alitsübaji kanga tongtibang mapa ka kümogo. Atangji, center government nungi relief jang yokba ya asenok sensaker asüba agi asenok dang meima yoker saka asenoki iba temeim ya asenok asoshi miim ama ka kümdaktsüogo. Aji oda, asenok asoshi tebilemstüji aon bushitsüba dang, anungji ajibo asenok temeten aser akhüm yoka asüyonga bener arua relief chi denji chiyongtsü. Asenok takümji idakji alonger, aji serbo lishi nung belepa benjongteptsü aser auyi longa pelateptsü. Joko, asenoka Delhi nungi relief jang meyokyonga asensasa asen taküm aser kibongbo mesüteta alitsüsa shisakaa inyaktsü mapang tongogo. Aji oda, kobanü asenoki Delhi dang joko Nagaland-i relief jang teyok ta shitetdir, panüji asenok 'Independent' angur asütsü. Iba amaji ataloktsüsa, taintem ya toktsür, lanurtemi temetetba aser temulungtetba tulu nung inyak tenzüksüla.

OLEMSABANG

Asenoki meyokteba jembiba Ojang karh

T. Meren Paul, Kohima

(Yashi adok nungi...)

13. Leptok - Nüngdak mali alangzüka entokba
Lepdang- Tagitsü atema ana kuma alangdangba
Lepzük- Alimela tahlang asüba agi tagitarutsü atema renzüka ayuba
14. Lepkhumung-Asüer kinungerdem anogo tatakzük tebur sa terok nü,
tetsür sa pungo nü kuhkhua asüer mangyima amongba
Mangmung- Tasütamaer kidangi asüku lemsatebi aoba,amongba
15. Asangchi-Tebu shibar mejangja tetsüri asoba chir(akidangbo asangki
nung sodaktsü) bastard
Kidachir- Tebur-i pie kidangi manioki tezülen tetsür nem tanur
bentsüba chir.
Kimulung chir - Kibong kümer kidang asoba chirnor
16. Nüma tadang- Tangar sentsü koktetba, akmesen maliba
Tedangi- Telok jeta jembishinüba, oyim shidak bener arutetba
17. Azüngashi - Teyazü masü saka ochi ta ita anü tsüngrem tsüngdang
kazüka yokba
Züngyazüngko- Ali chitepa, tzüjemtepa, küyi pongzü tebu nung nguita
kuliasüba
Züngyazüngko -Mongpu mapang tsünüsempongtsü metsüjang alu, atsü
ali nung aremba
18. Maketmasen- Mesaklok, keta sena mali
Mesenmetu- Aria mebilemba, aochia mamshiba, sendoka atokba
Mezüngmeshi- Tim yimya mesüi mejungi benshiba, nemja luja amshiba
19. Asepana/asepanu - Ken O mesüra mapa tila, shishia retreta agila
masü
Mechimena/mechimenu- Tachi tajemtsü, sen otsü, oset tsüset teraka,
tilaka, eshika
20. Mokdakratak -Yaretkongreta, tambur tantsür akumba agi kima
yimdonglen mayazüktetba.
Telemta- Atsükalok, yiruyipongba agi, dokyimra agi tetsüng tepen
marakzütet akumba.
21. Jaksah-Boksaa ao, ajasaa ao, tat - Ali chibo jaksah, marok jaksah
Jakma- Ana kuma ündang, sangdang
Asükrep- Pongdang amahlaoset telonglong nung südang adokba, tat-
tzüshi asükrep
Ajenpok, Setpok- Punglang sahzüka aluba, tat- tzüshi ajenpok
Aten- Teraksatsü tenzüka tarak sayuba, tat - nok aten, aina aten,
hairline crack
22. Ngasagadem-Tangar lirh ta mezüngshi pei sünütsü asüba yimya
tamajung
Mezümekum- Pei akaba uluba sayua ajungketa jembiba
23. Tadinemti- Awazü tulu, matidagi mapa tulu nung sodakba
Kuodinemti - Temulung tekiok, tebulem, tangar den tebilemba
melemsateper
24. Lepyanok- Mapa inyakdang anogo shia amshiba nok
Leplangnok- Kinüngbo süadoker pa indanglepyanokkinüngtsü nem
agutsüba
25. Atendang- Telok, nisung ana rarateptsü aliba anendaktsüba,
nokdangba
Bendang- Telok, nisung ana raratepa aliba piladaktsüba
26. Jongkok- Arrshi-i aodang amer aoba Jong tila, offensive shield
Odangjung- Arr den raratsü jong tulu süngkum aser Aroju nung ayuba,
defensive shield
27. Asükum-Hau ta mali ayimayima inyaksangshiba, jembishinüba
Jaksajaklem- Kentamata, alaka oa yimya benshiba
28. Anjong meshi- Asen Aor anüngdang chi chiyongtsü mapang, talisa
mapa inyakdang
Anjongtenari - Anü tekolak intang alidang asen tanela tenari (round
shadow) tetsüngmeketa yalokba mapang.
Anjong manga- Anüngdang chiyongba mapang süia aoba, süzüka aoba
29. Mojunga- Moluk, chi nung tsük mesüra jang dokokdang teyong nung
dokketa atua tezüleni mushia shezüka ludakja shiokba
Tepangmedema- Chi, moluk tebang tashi oshiokba, shiokba
Remden- Chi, moluk tera agi khu masüng oshiba
30. Taluposa- Kanga aikaanguba, ajak nung anguba
Moulamoshia- Nüngdakba kechisarena taginütsü peria agiba, akaba

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Bastar district nung Khristan ka tasümang aremtsü memela



May 04, 2025 nü Bastar district nung Khristanemi tasümang süngden ka gari lenmang nung yur longkak aitba noksa nung angur.

Monupii/May 08, 2025: Chhattisgarh state kübok Bastar district nung Khristan ka tasümang aremtsü memelaba sülen May 04, 2025 nü Khristanemi longkak aitogo.

April 21, 2025 nü Khristan, Ajay Baghel gari lendong nung kanga mejungi yirua Dhimarapal Medical College Hospital-i anir oa liasü. Pa anogo aika iba hospital nungji treatment agi saka meküzmükteti asü.

Par kibong züngsemtemi Khristan yimsü amangertemi benshiba ama tasü mangji aremtsü tebilemba liasü, ajisüaka Dashapal yimdak alirtemi ashishia nokdang.

Baghel aser par kibong ya Khristan yimsü dangi memeyipdang tamasabo Adivasi (tribal) nisungtem liasü, anungji taoba mapang Adivasi nunger asünungji akhi sobaliba yimsü kübok yimdak tasü mang arongdak arongtsüla, ta ashi.

Ajisüaka May 4 nü mangyimer Khristan kibong aser Khristanemi Baghel tasü mang süngdenji gari lenmang nung yur longkak aita liasü.

Iba anogo nungji tzünglu-a sashia aru, ajisüaka longkak aiter Khristanemi ozülu balala amer Khristanem tasü mang aremtsü temeden meshia ghonda aika longkak ait.

Bastar district nung

Khristanemi longkak aitba noksaji social media nung kanga prokshioغو. Gari lenmang mokdanger longkak aitba osang angashiba sülen Bakawand Block SDM, Rishikesh Tiwari den Tehsildar Jageshwari Gawde aser Station In-charge Domendra Sinha nunger iba tesemji tonga ao. Parnoki Khristanem dang longkak aitba anentsü mepishi, ajisüaka Khristanemi nikongdang tashi gari lenmang nungji mener longkak ait.

Tesüsa ketdangsertemi mepishiba sülen Ajay Baghel tasü mangji Jagdalpur kübok Karkapal-i bener ao aser yangji Khristanem leper ka nung arem.

Chhattisgarh state kübok Bastar region nung aliba yimtsüngtem nung Khristanem tasü mang aremtsü memelaba ajanga mapang shia Khristanemi timtem ajangshir. Meta talang nung süaka Khristanemi tasü mangji Jagdalpur nung aliba Karkapal cemetery-i bener oa aremtsüsa akümer.

Dashapal yimdak tongti yimsüsür leniba nung yimdaklirtemi Khristanem tasü mang aremtsü memelar. Tesüiba küm ishika nungi tenzüka Khristanemi tasü mang aremtsü temeden atema ola adok tenzükoغو.

Yimsü nung ajemdaker tasü mang aremtsü memelabaji linük temzüng kübok temeden alema inyakba lir, ta Khristanemi ashir.

May 4 nü longkak aitdangji Khristanemisa yim ajak nung Khristanem tasü mang aremtsü atema kimong lemszükjang, ta takhangba agütsü.

Taküm January ita nunga Chhindwada yimdak Ramesh Baghel tebu, pastor Subhash Baghel tasü mang aremtsü memelaba sülen Ramesh-i Chhattisgarh High Court aser Supreme Court naprongla nung temepishiba ken o benoka liasü.

Tasü mangji anogo 20 tashi hospital mortuary nung ayuba sülen tasüsa January 27 nü par yimdak nungi kilometer 25 pilar aliba leper ka nung ayaterm nung ang tasü mangji arem.

Chhattisgarh kübok Bastar nung Khristanemi tasü mang aremtsü atema temelaba manguba dang masü saka loktiliba aser rongsenkettzüng lenla nunga Khristanem sendoker.

Chhattisgarh Chief Minister Vishnudeo Sai-ibo item ama mangatettep adokba ya talisa Khristanemi yimsü meyipdaksüba ajanga lir; yimsü meyipdaksüba ya manen tashibo tasü mang aremba dak sendakba nung mangatettep maneni adoktsü, ta ashi.

Uganda nung Muslim nungertemi sayutsüngir ka tepset

May 08, 2025: Taoba ita Uganda nung moapu nung ayongzükb a evangelical sentong ka nung Muslim nunger aikati Khrista agizükba sülen Muslim nungertemi tejashi nung sayutsüngirji tepset.

Mbale district kübok Nabumali jila nung alir, David Washume April 3 nü tepset.

Anogo asemnü tashi pai Nalondo, Buwalasi aser Nabumali areas nung sayutsüngia jajaba sülen kidangi shilangba mapang nung Muslim yimsü alia amangertemi pa kotari agi tsüngset; pa arrshi küm 38 liasü.

Sayutsüngir Fred Wepuhulu aser David Washume nati

sayutsüngiba mapang nung tenati Muslim nunger temeshi kaket Quran nung aliba lai tekongtem aser Laishiba nung aliba lai tekongtem medemdanga jembia liasü.

Khrista ya Tsüngrem aser ainkar Muhammad yabo meimchir ka dang liasü, ta David-i jembia liasü. Tasemnübuba sentongji Nabumali jila nung agi, aser iba sentong nungji David Washume-i jembia liasü.

"Tasemnübuba sentong nungji nisung teimba adenshi. Pai lokti dang pei taküm nung temenen tepsettsü aser Khrista agizüksü ayongzükb. Yamaji Muslim nunger

densema nisung aikati Khrista agizük. Ajisüaka Muslim nunger kari tena anema yimyim ayima longkak aitba agi tenati iba tesemji toktsür ao aser medemer ka kidang jenok," ta sentong nung adener kati ashi.

Washume aser Wepuhulu na April 3 aonung kidangi meyipa aoba mapang aonung 10:00 ako meta Muslim nunger asema tena amak.

Wepuhulu jena otet saka David Washume bo jena moutetba ajanga Muslim nungertemi pa kotari agi tsüngset.

Mbale jila nung police aser Khristanemi David tepsetertem bushidar.

ANOGo ABEN TSÜNGREM DEN

Khristan libaliro tetenzükdak Mathi 4: 18-25.

Meimchir temetetba nung Nazaret nunger Yisui yaribaji meimchiri rasaa ashitsüba atema yari. Asenoki Yisu indang bilembaji Talangzüker aser Kümtetdakba ta angatetba nung dang atemer. Pa aji liasü, saka ano iba dang tali.

Tanga balaka rongnung, Yisuji mapang ajak nung liba-liko tesayur tulu ka liasü. Yisui tebilemba ka mesüra tangatetba ka nung dang Pa asoshi aser tanger asoshia tekong meranga mesot, Pai ajak asoshi jakla (morality) nung sot. Yisui ajaba odang lir: "Ni anidakang". Iba tajaba nung tashi angatsü asoshi shidak bilemtsü aser shidak alitsü temeshi tebilemtetba nüngdaker. Iba nung Khristan kati Khristan jakla tashi angur.

Telok nung jenjang akatsü asoshi Yisu sayuba liba-liko yimya ozüngji kija takümi amshitsüla. Alima nung rongsen meshidaki lemsatepba nung ni kechi inyaktsü? Ajemrepa alirtem tsütsü Kü tebilemba kechi? Yisui "Kü sülen anidakang" ta ashiba tetezü kechi?

Item nung shisadangang: mapang agia Mathi 5:1-22 züngang. Iba liba-liko ozüng ner telok nung, ne mapa nung, ner arogo nung aser ner kidang koda amshitsü bilemdangang. Nai iba tesayuba nung alitsü meranger asü?

O Kibuba, ne leman Kü dang sayuang, aser ni lenten leman nung aniang. T.Ken 27:11

Koba leman nung na aotsüla iba lemanji atema ni ne dang ashitsü aser sayutsü: Ni Kü tenük ne dak yur sayutsüngitsü. T.Ken 32:8.

Laishiba nung züngya 7

Alima nung nisung teimtibai azüngba kaketi Temeshi Laishiba ya lir; iba kaket ajanga nisung jenti ajungmesor aser tanelar chiyungtsü angur.

Laishiba nung kanga tongtibang züngya/züngdangba (number) aika lir aser item rongnung züngya 7 (number 7) ya densema lir.

Laishiba nung züngya 7 ya 735 ben tashi tetshia lir. Yisu Khrista-i Kangkidong nungi o 7 ben jembia liasü. Züngya 7 ya taneptsü anguba den sendaktepa lir. Elisha-i Naman dang taneptsü angutsü atema Yordan ayong nung tzü 7 ben chigoang ta ashi (2 Chubatem 5:9-10, 14).

Yisu-i 7 nübuba nung nisung aika aneptsü. Yisui tenetnübuba nung nisung tenet aneptsü aser item nisung aser tashidak indangji Mathi 12:9-13, Mark 1:23-26, Mark 1:29-31, Luk 13:10-13, Luke 14:1-4), Yohan 5:5-9 aser Yohan 9:1-7 Lai tekongtem nung shia angutsü.

Laishiba nung tetemjen/tetemsü atema temaitsüji züngya 7 ya amshir.

Jungkai Adok kaketi nung Tsüngremi tanela 7 alitsü indang shia lir aser ibaji sanchanu stand 7 ajanga sayur.

Jungkai Adok kaketi nung Tsüngrem Tanela 7 aliba indang pezüben shia lir.

Noah-i temerük shiruru shia jora 7 rong nung inok aser Yihusua leniba nung Israel nungeri Yiruko yimti 7 ben along.

Jungkai Adok kaketi ya zülua Asia minor nung tongti Arogo 7 dangi yok. Tatembang anogo nung timtem-toushi küm 7 alitsü.

Tsüngremi anogo troknü alima yangluba sülen 7nübuba nung anisüngzükb.

Jungkai Adok kaketi kija nung züngya 7 ya 54 ben tetshia lir aser züngya 7 ya Tsüngrem O tamendakdak lir.

Tejen Lai nung temeshi nisung 7 indang jangjajangja shia lir, aser parnokji Mosa (Yihusua 14:6), David (2 Putipuyang 8:14), Samuel (1 Samuel 9:6, 14), Shemaiah (1 Chubatem 12:22), Elijah (1 Chubatem 17:18), Elisha (2 Chubatem 5:8) aser Igdaliah (Yeremia 35:4) nunger lir.

Jungkai Adok kaketi nung Arogo 7, kodaktenyar 7, tajeiba 7, tashidak jangzü 7, tsüngmok 7 aser tesüsabuba tashidak 7 indang shia lir. Jangzü 7buba apuba mapang nung asürtem mezüng shia arutsü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Temoa

(v) pelar ta ashiba (thanks)

* Takok angur kaketshirtem dang tesayurtemi temoa ta shia tenüngsang agütsü.

Temoatsü

(adv) tajung aser tagitarutsü (blessing)

* Temoatsü ajak Tsüngrem nungi angur.

OLONG PAITEP # 7146

1		2			3		4		5	
						6				
7					8					
										9
			10							
								11		
	12				13					
14										
15							16			

TIPIEN

1. Ajidaksü
3. Anung nung aonung ayaba
6. Küm ka nung asortem
7. Tanendak
10. Kikümbang
13. Kilem nung atongba yin
14. Komo tamaitsü
15. Azü ajemba shiruru tila ka
16. Tanur masü

LANGTSÜNGLEN

1. Tsürabur nungi lemozükba
2. Yanü sür külen
4. Tsüngpret
5. A ____ tem
8. Mamatzü atema metsüba
9. Mesen tulu
10. Tekolak sobutsü
11. Mechi-mejemi sarasadem
12. Temulung tulu

OLONG PAITEP # 7145 TELANGZÜBA

TIPIEN :

1. Ayawara, 4. Aja, 6. Üata, 7. Sasa,
9. Tzülu, 10. Süin, 12. Teki,
13. Nunga, 16. Osen, 18. Aksü,
19. Apu, 20. Alimang.

LANGTSÜNGLEN :

1. Azüita, 2. Aitsü, 3. Awatsüng,
4. Ara, 5. Aren, 8. Lumiseta,
11. Tazüng, 14. Noksa, 15. Tera,
16. Oru.

NAI-A YA METETTER MA



India nung kanga kara renloka oya aliba electric vehicle brands, Odysse Electric Vehicles, puri HyFy ta nungja agütsür low-speed electric scooter tasen ka sayaogo. Odysse HyFy ya anogoshia senzüsenpong atema lir. Iba scooter ya 250-watt motor kati run asür aser 48V mesüra 60V battery options nung angutsü aser top speed ji 25 km/h lir. Iba ya low-speed EV ka asünung driving licence menügdaker mesüra state timba ka nung registration asütsü nüngdak madoker.

Scooter nung cruise control, keyless start, city drive, parking, and reverse modes, aser digital LED meter amala features tem densema lir.

Mizoram: BJP nungi N Zangura LADC tekolakba kümogo



Aizawl, Monupii/May 8 (Agencies): Bharatiya Janata Party (BJP) nungi N Zangura, Mizoram nung Lai Autonomous District Council (LADC) indang Chief Executive Member (CEM) tasenba kümogo.

Lawngtlai district additional deputy commissioner, David Lalrinawma-i, Lawngtlai nung LADC conference hall nung sentong ka agiba mapang pa tenangzüktepba achaayanga agia liasü.

Zangura-i iba mapa atema Zoram People's Movement (ZPM) nungi V Zirsanga melenogo, shibai February 27 nü office mapa agizükba sülen ita anashi dang lir mapa toktsüogo. Zangura CEM akümba sülen Mizoram kübok autonomous district council asemprongla nung BJP pur tashi dangi aruogo. LADC nung party-i Mizo National Front (MNF) den longjemer coalition executive committee ka tentetogo.

Tenangzüktepba agiba sülen

o jembiba mapang Zangura-i, jurila tejangraba masü saka nüburtem tejangraba ataloktsütsü atema rangloker inyaksü nangzük. Paisa, executive lokti tentet tasenba takok asoshi longjemer inyaksü mepeshiba den parnok kübok aliba tesemtem terenlok atema rangloker inyaksü tenangzükbaga agüja liasü.

Angh Vijay Kumar Singh-i May 2 nü Zangura ya Zangura asütsü shim aser pa dang anogo ter tsüngda pai aniba party majority asüba kuli agütsütsü tuyu. Pa ya 2020 küm December ita tenzükbaga iba council term nung iba mapa abener rongnung pongububa lir.

BJP aser MNF na tawa United Democratic Alliance (UDA) ka tentetogo aser parnoki ZPM-i aniba executive committee atsüngtoka liasü. BJP state tir Vanlalhmuaika-i ashiba agi, council züngsem 25 rognungi UDA pur züngsem 13 lir aser ZPM pur zünsem 11 lir.

Kasa mapang nung Lai

Students' Association (LSA)-i, yimden yimsüsüba nung tang mepetmesü adoker aliba ajanga council elections agishitsü khanga longkak aitba sentong ka ayongzükgogo.

LSA züngsemtemi Mongolbarnü nungi LADC office aser deputy commissioner office kima longkak aitar. Association's general secretary, Matthew Lalthumliana Fanchun-i, lenirtem melenjen melenba aitsüogo aser ashiba agi iba ajanga yimden yimsüsüba nung tetsükdaksü adoker aser terenlok maparen bangdaka lir.

Tensa mejungi aliba mapang district administration-i Bharatiya Nagarik Suraksha Sanhita (BNS) kübok Section 163 benokogo aser iba ajanga LADC Complex kima aser temeket nung nisung pongu dak tema adenshiba nokdangar.

LADC ya 1972 küm amenok aser Mizoram nung autonomous district councils asem rongnung ka lir aser iba yagi Lai nungertem tenzüker.

Manipur nung sepaitemi PLA tesep ka maktok

Imphal, Monupii/May 8 (Agencies): Tenokdangba agütsür aliba Revolutionary People's Front (RPF) indang armed wing People's Liberation Army (PLA) pur khen atema jenokdak ka central aser Manipur state forces temi Bodhbarnü maktokogo.

Itangitertem nungi osang tejangja angazükba sülen Thoubal district nung Nongpok Sekmai Police Station kübok

Bengin yimtsüng anasa Gwarok tenem nung meita aoba sentong benoka liasü. Assam Rifles, Manipur Police, BSF, aser CRPF nungi security personnel temi iba meita aoba sentong nung shilem agia liasü.

Anepdang ghonda asem tashi meita aoba mapang iba team yagi prangbong injang, bomb aser tanga hadirtem aika iba tesem nung nguteta liasü. Meita aoba mapang nisung

ka danga mapu saka parnoki PLA insignia keta aliba camouflage shirt aser pants den 303 rifle ka den magazine, high explosive hand grenades (detonator medeni) pezü, improvised "Pompi Gun" (mortar) ka, INSAS injang ana, INSAS LMG magazine ka aser tanga military osettem nguteta liasü.

Sepaitem ngutetba osettem ya local police station nem bendanga agütsüogo.

Manipur police-i KCP züngsem ana apu

Imphal, Monupii/May 8 (Agencies): Manipur Police-i Imphal West district nung tesem balala meita aoba mapang Kangleipak Communist Party (KCP) züngsem ana puogo.

Iba tesem nung rakzükrakdemba nung sendaka aliba telungpurtem aputsü atema asendenshir inyakba mapang tang telungpur ana ya puogo.

Mezüng meita aoba mapang KCP (PWG) züngsem Arambam Birkumar ya Wangoi Police Station kübok Iramsiphai

Leirak Ashangba nung Thambaleima High School gate anasa pua liasü. Police-i pa ket nungi mobile phone ana, Aadhaar card ka aser sen 3,530 nguteta liasü.

Ano tanga tesem ka meita aoba mapang KCP (City Meitei) züngsem, Oinam Sanamacha Meitei (27), Patsoi Police Station kübok Awang Khunou Mayai Leikai nung pua liasü. Pa ket nungi two-wheeler ka, olive-green bag ka, mobile phone ka den SIM card ana

aser wallet ka nguteta liasü.

Ketdangsurtemi ashiba agi, telungpur anaprongla ya rakzükrakdemba, tashiyim agi senotsü meshiba, sorkar ketdangsurtem, financial institutions, brick kiln kibur aser nüburtem amokmerenba nung densema liasü.

Maneni tena den sendaktepa alirtem aputsü aser KCP telok den sendaktepa aliba rakzükrakdemba network raksatsütsü atema bushisüngdang südar.

Tembar Russia den China külemi nokdaksü: Xi Jinping

Moscow, Monupii/May 08

(Agencies): World War II mapang Nazi Germany madak takok anguba bilemteta China Tir Xi Jinping-i Russia semdangba mapang "unilateralism and hegemonic bullying" anema Moscow den ozü linük nokdaksü ta Russia lenir Vladimir Putin dang ashi.

Anogo pezü atema Brehostibarnü Moscow-i arudang Xi-i linük ana tsüngta tamang tali katepba tenüng asang aser Russia-i tanen makai Ukraine nung amakba atema anüölen linük temi aitsüba asoshi tebu akumer ama angateter, koba Putin-i "latter-day Nazis" anema rarar ta ashir.

"Linük balalai pei mulungba nung inyaka amokbanger mesüshiba yimya amshiba mapang, China-i Russia den külemi tongpu apua alima nung tashi tulu khuret abentsü," ta Xi-i Putin dang ashi.

Kremlin nung Xi ya

medemer tajung ka ama agizükdang WWII nung Moscow-i shilem agiba indang Putin-i lemsatep, koba West ajanga ajemtsür ta mapang talangka nungi aija arur aser Ukraine rara ya Nazis anema tongpang tasen ka ta pai angatetba akangshir.

"Asen tembar China nunger den külemi asenoki historical truth atema tasü ita nokdaksü, rarba küm tem nung atalokba mamatsüsa wazüka ayutsü aser neo-Nazism aser militarism anema nokdaksü," ta pai ashi.

Tang Russia aser China ya "neo-Nazism" anema külemi nokdaka lir, ta Putin-i ashi.

Tan hopta Ukraine indang foreign ministry ajanga linük balala dang Victory Day sentong nung shilem agitsü asoshi mitkartem meyoxtsü ajungshi aser ibai kari neutrality sangdongba anema lir ta ashi.

Rara tepiyong Beijing ya neutral party ka ama lia aru,

saka Kyiv-ibo Ukrainian territory nung Moscow yaritsü asoshi China-i par nisung yok ta aitsür.

China aser Russia külemi WWII indang puti otsü "correct view" kumzüka ayutsü, United Nations indang "authority and status" kumzüka ayutsü aser China, Russia aser developing countries timba indang temeden aser tejangraba kumzüka nokdaksü, ajak adenba economic globalisation kasa aser shidak ajungkettsü, ta Xi-i ashi.

United States Tir Donald Trump-i Russia aser Ukraine dang küm asem dak tema raraba nung yimjung tezüngzüktep ka yanglutsü ajungshiba mapang Xi-i Moscow semdang.

China ya US den tariff war tenzüka lir, aser 2022 küm Russia den "no limits" strategic partnership zülutepba tali akangshitsü asoshi agreement balala züluteptsü imlar.

Israel-i Gaza amakdang nisung 16 tepset

Gaza City, Monupii/May 08

(Agencies): Israel-i Gaza Strip tesem balala amakdang Palestine nunger nisung 16 tepset aser aji masüadang ghonda 24 tsüngta amakba nung nisung 100 takum sama, ta medical ketdangsür temi ashir.

Central Gaza nung aliba Deir al-Balah aser Nuseirat refugee camp nung Brehostibarnü amakdang nisung asem tepset ta ashir. Gaza City anüdoklen Shujayea nunga nisung ka tepset aser kar yiru.

North tsütsü Israel warplanes temi Beit Lahiya nung ki ka nung tenük yoker amakdang nisung toku tepset. Rescuer temi tang tashi tetsür ka bushir, shiba ki chirepba agi nembanga alitsü südi ta amanger.

Beit Lahiya nung amakdak sünga tesem balala nungi arua jenboka alirtem liasü, ta osangbeneri ashi.

"Iba ki kibur aser pai tesem balala nungi nisung anidena alirtem iba ku telung nung tepset. Aika kanga sashia yirur Indonesian Hospital nung anir oa lir.

"Kibong ka nungi tetsür aser tanurtem densema nisung toku takum samaogo, aser nisung

timba samar aser jana agi nembanga lir," ta osangbeneri ashi.

Khan Younis anüölen Israel indang artillery ajanga tesem balala nungi adenshia jenoka aliba süki nung amakdang tetsür ka asü aser pezü yiru.

Israel-i iba linük telungi yokba teyari ajunga nokdangba ajanga ayawara tia nung lir ta shisabulutepba mapang Gaza nung maneni amaker.

March 2 nungi asendenshir Israel-i Gaza mokdangba ajanga yangji aliba nüburtem tali

timtemdaksür, teyari ajunga nokdang humanitarian teyari makai kumogo. Bodhbarnü Gaza nung chiyongsü agütsür tongti, World Central Kitchen (WCK) ajanga sorochiokba ajunga anenogo ta sangdong.

"Chiyongsü yanglutsü maka," ta aid group ajanga soup kitchens aser mobile bakeries nung amshitsü am aser danga oset agimaba sülen ashi. WCK yagi anogoshi chiyongsü aoshö 130,000 aser loaves 80,000 agüja liasü.

(Maneni tapak 8 nung...)

Office of the LONGMISA SENSO MUNGDAW

P.O Mokokchung - 798601 B.P.O Longmisa
Mokokchung : Nagaland

TENÜNGSANG AGÜTSÜR

Longmisa Senso Mungdaw ajanga tenüngsanga Nagaland Puplic Service Commission, Combined Educational Service Exam (NPSC-CESE) 2024 nung takok tajung angur nem konang tetushi agütsür.

1. **Sp. Chubasenba Y Lemtor** (S/O Wb. Yashitemjen Lemtor & Wt.Nungshisula Jamir) Graduate Teacher (Mathematics) Under School Education.
 2. **Kr. T Moloyangla** (D/O Wb. I Tamsu Ao & Wt. Tiasungla) Graduate Teacher (Science) Under School Education.
- Asen Teyanglur Tsüngremi nenok taküm tarutsü anogotem nunga temoatsü nung len ania moajangma.

Sd/-
Pangersosang
President, LSM

Sd/-
I Senkanungba Ao
G. Secretary, LSM

GOVERNMENT OF NAGALAND

DIRECTORATE OF YOUTH RESOURCES AND SPORTS

NAGALAND: KOHIMA

NO.DYRS-SPORTS-Cash Award/9/2016(V-II)/ Dated, Kohima the ____ May 2025.

Press Release

This is to inform that the Department of Youth Resources and Sports, Nagaland, Kohima is inviting application from meritorious sportspersons who won medals under recognized disciplines in the North - East Level, National Level and International Level during April 2024-March 2025. Eligible candidates are directed to submit their achievement certificates through the concerned Association and to submit to the Directorate office on or before 30th June 2025. Applications received after the due date will not be accepted.

Sd/-
KETHOSITUO SEKHOSÉ, NCS
DIRECTOR



Office of the Asangma Shisashir Telongjem

KHONANG TETUSHI AGÜTSÜR



Wb. K. Imlien Longkumer aser Wt. Sakorepla Imsong jala **Kr.Sungjeminla Longkumer-i** Department of Economics, Nagaland University, Lumami, kübok "**Capital Formation in Agriculture: A Case Study of Dimapur and Peren Districts of Nagaland**" onük shisaluyimba nungi Doctor of Philosophy in Economics (Ph.D) takok nguteta tenüng tajung bener arutsüogo, Asangma Shisashir Telongjem (AST) mendenti ajanga Dr. Sungjeminla Longkumer nem khonang tetushi agütsür aser Tsüngrem tenüng asanger.

Tsüngremi La taküm aser wadang maneni moaja, takok nung len aniangma.

Sd/-
IMKONGLIBA IMSONG
(President)

Sd/-
TALIENLA
(General Secretary)

Office of the Settsütsür Telongjem

Settsü: Mokokchung

TENÜNGSANG AGÜTSÜR



Wt. Imtinenla Jamir D/o Mr & Mrs. Imotiba Jamir, lai Common Educational Services Examination (CESE) 2024 nung Assistant Professor B.Ed. College (Pedagogy of Social Science) under Higher Education jenjang nguteta khonang nüngsang bener arutsü nung kanga pelar aser tenüngsang tetushi agütsür.

Tsüngremi la taküma aser wadang ano maneni moajangma.

Sd/-
Odensangla
President

Sd/-
Repamongla Jamir
Secretary

Office of the Mangmetong Watsü Telen

TENÜNGSANG ASER TETSUSHI AGÜTSÜR

Mangmetong Watsü Telen ajanga Wt. Nokennaro Longchar W/o Nungsangmeren Imchen, Aoli Watsü Tongti Tezulula asütsü shimba asoshi pelaba den la wadang asoshi sarasadem nung bilemtetba lemsateper.

Maneni item lanurtemi takok tajung ngutetba asoshia pelaba den tenüngsang agütsür.

1. **Kr. Putusenla Pongen**, D/o Tiarenla & T. Talilemsu, lai PA/SA in SSC CGL and IBPS PO (Canara Bank) examinations 2024 Post ngutet.
2. **Kr. Sunepbenla Imchen** D/o Yashikokla & Imtikumba, lai HSLC Examination 2025 NBSE nung 9th Rank ngutet,
3. **Sb. Putikokba Imchen**, S/o Imnanaro & Tsupongliba, pai Graduate Teacher (Mathematics) under School Education 2024 of NPSC post ngutet,
4. **Sb. Merensow Pongen**, S/o Moasangla & Imlikaba, pai Group -A Officer Engineer THDC PSU (Ministry of Power) Examination 2024 nung takok ngutet.
5. **Sb. Imtisunep T. Longchar**, S/o Lt. Bendangmongla & Tekatemsü, pai Common Educational Services Examination 2024 of NPSC nung Work Experience Teacher under SCERT post ngutet.

Ano HSLC aser HSSLC tatidang nung takok angur ajak den pelaba lemsateper. Tsüngremi nenok takümtem maneni len aniangma.

Sd/-
Wt. Tarepliila Pongen
President, MWT

Sd/-
Wt. Moarenla Jamir
Secretary, MWT

ARITEPA

AYOKER

Nihokhu nung Highway anasa ali tzüng @70/sqft. agi ayoker. Tasazük mashi angutsü.
Kanga aritepa ayoker
Contact : 97742 20551 ; 89748 69756 ; 84150 81855

Kohima nung consultation senden ka menogo



May 8 nü DPDB Hall, Kohima nung taruba Dr. T. Ao Inter-District Football Tournament atema consultative senden ka amenba mapang tangokba noksa nung angur.

Dimapur, Monupii/May 8 (TYO): Taruba Dr. T. Ao Inter-District Football Tournament atema sensaksemtüsü aser renemshitsü atema DPDB Hall, Kohima nung May 8 nü consultative senden ka menogo. Iba asayamung ya Kohima nung August 1 nungi 15 tashi asayatsü lir.

Deputy Commissioner Kohima, B. Henok Buchem, NCS lenisüba nung iba senden amen aser Nagaland Football Association (NFA) General Secretary aser MLA Benei M. Lamthiu aser NFA tir K. Neibou Sekhose nung densema tanga ketdangsürtemi shilem agia liasü.

MLA Lamthiu-i, state nung football asayamungtem jenjang

kanga junga akümba indang lemsatep aser asayamungtem süoki ia aser bendanga agüja ayongzüksü nüngdakba lemsatepa liasü. Paisa, All India Football Federation (AIFF)-i Nagaland ya North East aser India nung football terenlok asoshi tongtibang shilem agir ka ama züngshir, ta ashi.

Lamthiu-i, ketdangsürtem dang pei khuret takok tashi abentsü ayongzükbä den asayamung takok ngua ayongzüka asayatsü asoshi NFA-i takokba tashi technical support nangzük, koba pai ashiba agi, lanur football asayartem atema kanga tongtibang sabang ka asütsü.

Kasa mapang nung DC Buchem-i, Tuensang District-i taoba asayamung kanga

junga ayongzüka asayaba atema tenüngsang agütsü aser Kohima nung ketdangsürtem dang taoba mapang tang nungi taruba asayamung ya tajungba ayongzüka asayatsü ayongzüka liasü.

NFA tir K. Neibou Sekhose-i, asayamung puti otsü aser iba ya koda tongtibang iba indang lemsatep aser ashiba agi iba asayamung ya AIFF-i officially agizükogo. Paisa, asayamung nung shilem agitsü aliba asayar aser official tem ajak portal nung officially züngoksemtüsü, ta ashi.

Senden ya committee balala tentettsüba aser asayamung takok ngua ayongzüksü atema sentong balala tatongi sensak asema sülen tembanga liasü.

STATE OSANG :

Tapak 2 nungi...

Aliba yimtak Züngi Benjungmung kaogo

Taküm 2025 küm züngi lu ayimer tetsür rongnungi tajungtiba senpet Wt.Merangkala-i agizük aser tebur rongnungi Wb.Limatoshi Kichu-i agizüka liasü.

Iba sentong nung Tsüngrem lenisüba jazüka Aliba Baptist Arogo Pastor Ren.Nungshi Pongen ajanga sarasademba den Dr.Cressida ajanga tarur pela agizüka jembia Wb.Longzü GB ajanga iba benjungmung nüngtem o

rateta ashi aser aluyomer tenüng nung Wb.Bendangnicht Jamir-i jembia aser Wt.Temjentola janga tepela o jembia aser Lanutoshi Kichu Deacon-i sarasadema sentong tembang.

Tetushi Tejaoker Hon'ble Advisor Agriculture Mhathung Yanthan-i züngi ayokba, chiyungtsü aser osettsüset stalls-tem lapoktsü aser tongti tesemdang Hon'ble Minister, Tourism & Higher Education

Temjen Imna Along-i Tungden ki tasen ka asüba lapokja liasü.

Tanu item sentongtem temer kelen sobaliba asaya balala asaya aser nikongdang ano DGB Band, Moko Koza, Sideline Band,Sangti Ozükum aser Rongpangnok Ozükum nungeri shilem agia Musical Extravaganza sentong ka agia iba Züngi benjungmung sentong kanga dang takok ngua agia tembanga liasü.

NDPP tir kinungtsü Nokpangmenla den asükhu...

Kasa mapang nung Member of Parliament, Lok Sabha S. Supongmeren Jamir-ia, Amenla asüba osang angazüka kanga aoksaba aser temulung koremba sangdong ka ajanga lemsatepogo.

Amenla ya kanga tesüngjem, temeim agi sünga aliba tetsür ka shibai lar kibong kanga junga nongitogo. La anojungi asüba ya lar kibong asoshi dang masü saka la junga meteta alirtem ajak atema takoksa lir.

Mangyimjashi tia nung aliba mapang kü tebilemba aser sarasadem N. Chingwang

Konyak aser par kinungertem den lir aser Tsüngremi parnok nem tashi, anisüngzük aser yimjung agüjang ta sarasademtsür, ta paisa ashi.

Maneni Nagaland Chief Minister Neiphiu Rio-ia, People's Democratic Alliance Convenor aser Nationalist Democratic Progressive Party (NDPP) tir Chingwang Konyak kinungtsü Amenla asüba osang angazüka mang ayimba lemsatepogo.

Amenla ya tesüngjem, telemla aser tamang kanga takang tetsür ka liasü. Lai la

temeim taochi agi nisung aika dak kongshiogo. Bendanga agütsüba kinungtsü, tetsü aser otsüla ka ama la ya lar kibong asoshi tongshia ka liasü aser tepela aser tejashi tia ajak nung temeim lemsa-a aremzüka aruogo.

Ni aser ozü kibongi asür kinungertem den asükhu lemsateper. Tulusang tsüngremi parnok nem tashi, anisüngzük aser yimjung agüjang ta aser asür tanüla teti tatem makadak anisüngzükdakjang ta sarasademtsür, ta kasa sangdong ajanga Rio-i ashi.

IPL 2025: RR-i Rana melen Lhuan-dre Pretorius shimogo

Monupii/May 8, 2025

(Agencies): Rajasthan Royals (RR)-i Brehostibarnü sangdong ka ajanga, Indian Premier League (IPL) nung tanungba asayatem atema Nitish Rana melen South Africa nung batter Lhuan-dre Pretorius shimba sangdongogo.

RR puri taküm tang tashi nung asaya asem dang akok aser asaya teku nung tamakok anguba sülen parnok tang table nung tekububa nung lir aser playoff atongtsü kecha timla mali kümogo.

"Rajasthan Royals (RR)-i Nitish Rana melen Lhuan-dre Pretorius shimogo. Rana yiruba ajanga TATA Indian Premier League (IPL) 2025 nung tanungba asayatem nung masayatetsüsa kümogo," ta kasa sangdong ajanga metetdaksü.

Pretorius ya RR nung base price sen lakh 30 yong denogo.

Taküm Rajasthan Royals nungi 11 ben asayaba mapang Rana-i run 217 yanglu. Pa indang average ji 21.70 aser strike rate 162 liasü. Pai half century ana yangluogo aser Chennai Super Kings den

asayaba mapang run 81 yanglua liasü.

T20 career nung Pretorius ya tang tashi nung asaya 33 nung asayar lir aser iba mapang pai run 911 yangluogo. Pa indang average 27.60 aser strike rate 147.17 lir. Pai tang tashi nung half century trok yanglur lir aser pai run timtiba yanglubaji 97 lir.

Taoba küm ICC U19 World Cup asayaba mapang pa kanga nüngtugu aküm. Pai iba asayamung nung kanga junga asaya-a asaya trok nung run 287 yanglu, kong half-century asem yangluba densema liasü. Iba asayamung nung pa indang average 57.40 aser strike rate 94.09 liasü.

Pretorius ya South Africa indang SA20 league nung RR indang sister franchise Paarl Royals nungi asayaogo. 2025 season nung pai asaya 12 nung run 397 yanglua liasü. Pai half-century asem yanglu aser run timtiba yanglubaji run 97 yangluba liasü.

RR pur taruba asaya May 12 nü Chepauk Stadium nung Chennai Super Kings (CSK) den asayatsü lir.

BENDANGLI OSANG : Tapak 7 nungi...

Israel-i Gaza amakdang...

"Trucks tem Egypt, Jordan aser Israel nung renemer lir. Saka parnoki temelaba makai marakzüter. Humanitarian aid tem aيتدaktsütsüla," ta WCK founder Jose Andres-i ashi.

Taoba mapang World Food Programme-ia Gaza nung parnoki chiyongtsü rizünga ayuba ajak temogo ta sangdonga liasü, anungji Palestine nung meyrirjang aika asoshi takum alitsü teimla samadaksü. Tanen makai mokdangba ajanga ayawara tekeraba nung tenzüksü, ta aid agency temi ashir. Nisung takum alitsü asoshi chiyongtsü nüngdakba agi anüngba sünga lir aser humanitarian worker temi yasa-tzüraaba ajanga shiranger anepalu mesüteter ta ashir.

Rights groups temi chiyongtsü aser danga teyari osettem nokdangba ya tasa tamajung lir ta aitsür aser ibai war crime lir ta ashir.

Aid centres ishika anünga aliba nung nisungtem nungteper. Tanur, tetsür aser teburtem chiyongtsü teran anünga aliba atema rakteper. Bakeries tem shibangogo aser totzü agi anüngba ajanga tzu agütsüba tesem nung mapa meinyakteter.

Ano Gaza alema oa tensa tamajungba akumer, kong Israel Defence Minister Israel

Katz-i Iran dang Hamas aser Hezbollah ama tia kasa ajurutsü ta ashir. Houthi indang drone ajanga Israel indang Ben Gurion airport anasa amakba sülen pai iba o ya ashi.

"Ibai ner mapa lir. Onoki Beirut nung Hezbollah dak kechi inyak Gaza nung Hamas dak kechi inyak, onoki kasaji Tehran nunga inyaktsü," ta Katz-i Brehostibarnü ashi.

Yemen indang Houthi teloki ballistic missile amshia Tel Aviv nung Ben Gurion International Airport anasa Deobarnü amak aser ibai Gaza nung Palestine nung bhekuma amakba lir ta ashi.

Iba yongji tayimtsü senzüba nung tetsükdaksü ajuru aser Israel-ia Sanaa indang international airport aser Houthi kübok aliba tesemtem nung power station tem amak aser nisung ka tepseta ter dak tema yirutsü, ta Houthi osang ajanga ashi.

Iran-i Houthi telok meyarir ta ashir. Red Sea nung "freedom of navigation" atema Oman tetsüngtai ia Mongulbarnü United States aser Houthi tsüngta ceasefire yangluaka Houthi odongtar Yahya Saree-i, "Onoki Israel nung tsükchir anema military operations tali agitsü aser Israel aser par rong dak tenük yoktsü," ta shia liasü.

BILEMDANGANG

"Tesüiba kanga majung süaka tenzüksütsü maongka lir."